

Na osnovu člana 8a. stav 2. Zakona o putnim ispravama Bosne i Hercegovine („Službeni glasnik BiH“, br. 4/97, 1/99, 9/99, 27/00, 32/00, 19/01, 47/04, 53/07, 15/08, 33/08, 39/08 i 60/13), ministar Ministarstva civilnih poslova Bosne i Hercegovine d o n o s i

**PRAVILNIK
O OBLIKU, SADRŽAJU I MINIMALNIM ZAŠTITNIM ELEMENTIMA
PASOŠA, DIPLOMATSKOG I SLUŽBENOG PASOŠA**

Član 1.

(Predmet)

Ovim pravilnikom uređuju se oblik, sadržaj i minimalni zaštitni elementi pasoša, diplomatskog i službenog pasoša.

Član 2.

(Oblik i broj strana)

Pasoš, diplomatski i službeni pasoš je knjižica pravougaonog oblika dimenzija 88 x 125 mm koja sadrži 32 strane. Strane od 3 do 32 sadrže perforirani serijski broj.

Član 3.

(Identifikaciona druga strana)

(1) Tanka polikarbonatna savitljiva identifikaciona druga strana sadrži sljedeće natpise, na bosanskom, hrvatskom i engleskom jeziku latiničnim pismom i srpskom jeziku ćirilničnim pismom:

- a) vrsta,
- b) obilježje zemlje
- c) prezime,
- d) ime (imena),
- e) datum rođenja,
- f) mjesto rođenja,
- g) jedinstveni matični broj,
- h) spol,
- i) serijski broj pasoša,
- j) datum izdavanja,
- k) datum isteka,
- l) izdat od i
- m) potpis.

(2) U tijelo druge tanke polikarbonatne savitljive identifikacione strane u za to predviđenom mjestu stavlja se fotografija u boji i serijski broj.

(3) Na istoj drugoj strani predviđeno je mjesto za potpis nositelja.

Član 4.

(Unos ličnih podataka nositelja)

(1) Lični podaci nositelja pasoša prilikom personalizacije unose se na latiničnom pismu, a kod unosa podataka o mjestu rođenja za rođene u Bosni i Hercegovini upisuje se mjesto i općina rođenja, a za rođene u inozemstvu mjesto i država rođenja. Za državu rođenja upisuje se međunarodna oznaka.

(2) Podaci o prezimenu i imenu (imenima), mjestu, općini i državi rođenja upisuju se u izvornom obliku onako kako su upisani u izvodu iz matične knjige rođenih. Pravila skraćivanja imena zbog tehničkih ograničenja upisa u skladu s preporukama iz ICAO 9303 dokumenta se definiraju posebnim Uputstvom koje na prijedlog Agencije za identifikaciona dokumenta, evidenciju i razmjenu podataka Bosne i Hercegovine donosi ministar Ministarstva civilnih poslova Bosne i Hercegovine.

Član 5.

(Unos podataka o nadležnom organu koji izdaje pasoš, diplomatski i službeni pasoš)

Podatke u rubrici „izdat od „ definira nadležni organ, a maksimalan broj slova za ovu rubriku određuje Agencija za identifikaciona dokumenta, evidenciju i razmjenu podataka Bosne i Hercegovine u skladu s tehničkim ograničenjima.

Član 6.

(Sadržaj 32 strane)

Na 32 strani pasoš, diplomatski i službeni pasoš sadrže sljedeći tekst:

- a) „Ovaj pasoš treba čuvati na svaki način i ne smije se mijenjati.“;
- b) „Ovaj pasoš smije upotrebljavati samo lice na čije je ime izdat. Nositelj pasoša mlađi od 14 godina može putovati u inozemstvo samo u pratnji roditelja ili zakonskog zastupnika, odnosno mora imati saglasnost oba roditelja ili zakonskog zastupnika, odnosno staratelja, koju je ovjerio nadležni organ, ako putuje u pratnji drugog lica.“;
- c) „Ovaj pasoš je važeći ako je potpisan od strane nositelja na mjestu određenom za potpis. U slučajevima kada je nositelj pasoša maloljetno lice do 12 godina starosti, nepismeno lice, ili uzimanje potpisa nije moguće, iz drugih objektivnih razloga na mjestu predviđenom za potpis upisuje se oznaka XX“.
- d) „Nositelj ovog pasoša je državljanin Bosne i Hercegovine.“;
- e) „Ovaj pasoš sadrži 32 strane“.

Član 7.

(Posebni sadržaj diplomatskog pasoša i službenog pasoša)

(1) Treća strana diplomatskog i službenog pasoša sadrži na bosanskom, hrvatskom i engleskom jeziku latiničnim pismom i srpskom jeziku ćiriličnim pismom ispisan sljedeći tekst:

„U ime Predsjedništva Bosne i Hercegovine, Ministarstvo vanjskih poslova Bosne i Hercegovine moli sve nadležne organe u Bosni i Hercegovini, kao i organe drugih zemalja da bez smetnji propuste nositelja ovog pasoša i da mu u slučaju potrebe ukažu pomoć i zaštitu.“

(2) Četvrta strana diplomatskog i službenog pasoša sadrži na bosanskom, hrvatskom i engleskom jeziku latiničnim pismom i srpskom jeziku ćiriličnim pismom ispisane sljedeće natpise:

- a) prezime i ime,
- b) status – funkcija,
- c) ovaj pasoš važi do:
- d) Sarajevo,
- e) ministar.

(3) Ime i prezime imatelja pasoša prilikom personalizacije unose se na latiničnom pismu a naziv institucije i status - funkcija na engleskom jeziku.

Član 8.

(Automatsko očitavanje podataka i beskontaktni memorijski element)

(1) Obrazac pasoša, diplomatskog i službenog pasoša na drugoj stranici sadrži prostor za potrebe automatskog očitavanja podataka u koji se unose vidljivi alfanumerički podaci o ispravi.

(2) Obrazac pasoša, diplomatskog i službenog pasoša u korici sadrži beskontaktni memorijski element koji služi za automatsko očitavanje podataka u skladu s ICAO 9303 standardom u koji se unose podaci iz stava (1) ovog člana i biometrijski podaci otiska prsta koji se štite korištenjem SAC (skraćena od: supplementary access control kojom je definirana tehnika zaštite biometrijskih podataka).

Član 9.

(Zaštitni elementi)

(1) Obrazac pasoša, diplomatskog i službenog pasoša sadrži zaštitne elemente. Tehničku specifikaciju zaštitnih elemenata utvrđuje Agencija za identifikacione dokumente, evidenciju i razmjenu podataka uz saglasnost ministra Ministarstva civilnih poslova Bosne i Hercegovine.

(2) Tehnička specifikacija zaštitnih elemenata ima stepen tajnosti, koji određuje direktor Agencije za identifikacione dokumente, evidenciju i razmjenu podataka, u skladu sa Zakonom o zaštiti tajnih podataka („Službeni glasnik BiH“, br. 54/05 i 12/09) i ne objavljuje se u „Službenom glasniku BiH“.

Član 10.

(Prestanak važenja ranijih propisa)

Stupanjem na snagu ovog pravilnika prestaje da važi Pravilnik o sadržaju i minimalnim zaštitnim elementima pasoša, diplomatskog i službenog pasoša („Službeni glasnik BiH“, broj 51/09).

Član 11.

(Stupanje na snagu)

Ovaj pravilnik stupa na snagu osmog dana od dana objavljivanja u „Službenom glasniku BiH“.

Broj 06-30-4-108/13
11. septembra 2013. godine
Sarajevo

Ministar
Mr. **Sredoje Nović**, s.r.